

欽定剿平粵匪方略

欽定勦平粵匪方略卷一百五十一 丙辰

四月初一日 亥 丁德興阿翁同書奏言 謹

伺大營已久三月二十三日忽據探稱有股匪
潛至距大營僅二里許 臣德興阿親督官兵由
西路分攻偏近七里橋迤西賊穴砍殺數十名
燒燬賊壘二座該逆蒼黃無措卽奔竄徐家集
糾率大股出巢死拒 臣德興阿揮令富明阿等

帶領馬步各隊分三路環擊復以勁旅擣其中
堅該逆出巢圖竄各隊乘勢掩殺旋將徐家集
賊壘四座平毀敗匪披靡有西向樸樹灣而遁
者有南向烏踢溝而遁者臣等一面飛飭營總
索昌帶隊繞出賊前會同派防儀徵之李志和
等帶兵一千一百五十名跟蹤追勦臣等復揮
軍分路搜捕至樸樹灣該逆已將浮橋燒燬官

軍未能飛渡計共斃賊五百餘名落水淹溺者
無算是日鄧紹良松齡等復帶領馬步兵勇進
攻三汊河轉戰四時斃賊二百餘名臣等查近
營賊壘雖經節節掃平而三汊河尙有大股死
拒牽掣我師又復分股西竄誠恐衝撲儀徵兵
少備多殊難支持奏入

上諭曰西竄之賊剿辦若何占踞何處著迅速具奏

初二日

戊子

德興阿翁同書奏言據武慶稟報三

月二十三日官兵四面環攻江浦該逆由南門
竄出我兵乘勢掩殺力奪縣城賊衆披靡斬馘
無算立將江浦城克復臣等查江浦爲江皖接
壤北路要津斷難任賊久踞茲武慶張國樑等
勦力同心士卒用命甫逾旬日併浦口一同攻
克洵足大振聲威惟本日樸樹灣之賊因官兵

痛勦復向儀徵一路遁去勢必合併昨日西竄
賊黨益肆鴟張卽飛咨張國樑統帶所管得勝
兵勇星夜兼程前赴儀徵幫同穆克登額李志
和翰殿華等攻勦俾臣等得與鄧紹良專勦三
汊河賊巢以杜旁竄

德興阿翁同書又奏言正在封摺間據穆克登
額報稱遵檄馳赴儀徵行抵二十里鋪卽聞李

志和等營盤失陷儀徵失守查逆賊因連日被官兵痛勦並踏平多壘紛紛向西竄逸節據李志和等報稱儀徵危急又據鞠殿華報稱追至龍和集地方與賊接仗茲聞儀徵失守實堪憤恨而儀徵縣知縣范驥迄無一字稟報臣等惟有嚴飭先後派出之馬步官兵趕圖攻克並飛咨張國傑迅帶得勝兵勇星夜兼程來儀夾攻

以期迅速克復奏入

上命軍機大臣傳諭德興阿鄧紹良翁同書曰前因儀徵兵單浦口克復後諭令德興阿等卽飭張國樑帶兵由六合直趨儀徵會合新調各兵相機勦洗本日據奏儀徵業經失守儀徵毗連山陽交界之蔣壩地方該處商賈輻輳米艘停泊甚多若令關入則清淮全局震動而六合天長一帶在在空虛尤須加意防

範不可稍有疏虞著德興阿等嚴飭先經派出之索
昌等馬隊並鞠殿華博安等馬步隊會合張國樑新
克江浦之得勝兵勇趕緊將縣城克復毋許稍有稽
遲致再蔓延爲患並著將儀徵縣知縣范驥未經稟
報緣由及現在下落查明具奏

上諭內閣曰逆匪竄踞江浦縣城經張國樑武慶移師
進勦於二十三日四面環攻該逆由南門衝出我兵

賊船多隻由裕溪內河乘夜駛出守備處起陸
督領三板等船迎勦礮火連施燔沈大小賊船
五隻焚溺賊匪多名其蕪湖各壘之賊自二月
二十三日以來時於范羅山小河南出黨窺竄
江長貴督飭各兵勇隨時分投截擊日有斬擒
三月初一日該逆忽出黨五六百人來撲小河
南楚黔勇營我勇俟其近濠排開槍礮江長貴

派隊由營後馳出抄勦吳全美亦督水師前來
接應該逆奔退回巢負嵎死守我軍明攻暗襲
皆未得手突於十七日黎明賊黨千餘人出巢
埋伏范羅山下分股前來誘敵江長貴派隊三
路迎勦槍礮齊施羣逆敗竄共計殺賊一百餘
名再據皖南道鄧瀛稟稱婺源之賊竄及休甯
並有另股攻陷祁門進擾黟縣十六日賊復踰

羊棧嶺竄至甯國之太平縣境屢稟請兵分援
蕪湖甯國等語查江西賊勢鷓張前因浙防告
警經臣派令副將秦如虎統帶兵勇一千名赴
浙援應旋聞賊由景德鎮分竄入徽復陷婺源
祁門徽州府城危急當卽飛函何桂清速飭秦
如虎一軍移往徽州援剿今賊蹤又闖入太平
縣境逼近甯國自應分撥勁兵以顧全局而臣

軍祇有此數實已無可再分幸張國樑一軍已將江浦縣城克復北岸肅清乃飛令該總兵卽日拔隊星夜調回江南抽派遊擊楊瑞乾等勇一千五百名飭副將蔡應龍統帶馳赴甯國由太平一帶迎勦以斷蕪賊援應保固甯國並飛檄副將李德麟統帶紅單拖魯戰船駛上大通一帶扼勦截賊沿江竄路以爲陸軍聲援奏入

報

聞

初六日
壬辰

上命軍機大臣傳諭葉名琛柏貴曰現在江西賊勢猖獗劉長佑一軍尙阻袁州周鳳山兵勇接仗失利曾國藩雖調集兵勇力保省垣而外援不至省城終屬孤危江省待援情形誠屬萬分喫緊因思大兵赴援

非有大員統帶不足以嚴軍律而壯先聲著葉名琛等將前諭調赴江西精兵五六千名卽飭令提督崑壽統帶前往剋日起程由贛州一帶奮力進剿期將失守各城次第克復保衛省垣該督旣撥兵赴援所需軍餉卽著寬爲籌備並著將該提督帶兵起程日期迅由海道馳奏

初七日 癸巳 德興阿奏言賊衆現在西竄惟三

河尙餘逆壘牽擊我師二月二十六七等日馬
步兵勇疊次進攻均有斬擒二十九日已革總
兵松齡等由王家港向南進攻遊擊鄧鳳林等
由三汊河北岸向東進攻參將英貴由中路進
攻總兵安勇及鄧紹良所派之遊擊黃朝恩等
由運河東岸進攻協領富明阿營總海全帶領
馬隊營總德克津布帶火器從兩旁抄擊均撲

至濠邊將其卡房燒燬該逆急出大股抗拒我
兵鼓銳直前斬斃賊匪二百餘名奪獲器械無
算至攻撲儀徵之賊於二十四日竄至新城地
方經李志和等帶兵迎勦該逆另股由舊港山
根兩路抄撲縣城遊驪景和知縣范驥在東門
抵禦兵勇各有傷亡賊卽由北門闖入李志和
等營盤守兵無多被賊衝破據李志和景和范

驥稟報情形大略相同連日該逆時出近村擄掠經官兵分攻斬擒甚衆現在張國樑渡江南回因由揚營抽兵五百餘名飭總兵薩炳阿統帶馳往江浦會同武慶防勦向榮已派總兵明安泰帶兵千名渡江協勦儀徵至穆克登額索昌帶領馬隊五百餘名已紮儀徵之西陳堡橋杜賊竄往六合之路鞠殿華巴林保博奇等帶

馬步隊一千餘名已紮儀徵之東樸樹灣杜賊
回窺揚州之路並飭隨時會合夾擊又嚴檄李
志和等收集兵勇由北路進攻以期早復城池
儀徵縣知縣范驥署奇兵營遊擊景和派防總
兵李志和均請

旨先行革職仍責令帶罪自效如查有聞警先避重情
仍當據實嚴叅奏入

上諭內閣曰儀徵失守著德興阿等嚴飭在事將弁奮力進攻剋期收復毋稍遲延所有儀徵縣知縣范驥署奇兵營遊擊景和派防總兵李志和均著先行革職仍留軍營責令帶罪自效如查有聞警先避重情卽著據實嚴參

德興阿又奏言遵查此次揚營失事之由因托明阿專信雷以誠之言以長圍爲可恃復旬日

虛報勝仗塗飾目前遂一切玩泄從事以致大挫至揚城失陷後旋即收復實由逆匪之不敢堅守而逆匪之所以不敢堅守者實因西面官兵連次力攻恐遂斷其歸路故盡力狂奔臣前奏未見他處兵勇之語係據富春鞠殿華二人所稟伊二人係同時入城搜勦且信其素行樸誠是以卽於摺內敘入至雷以誠與陳金綬是

日泊船萬福橋並未聞其督隊攻城鄧紹良曾
向臣面述有東路並無一騎相助之語嗣經行
文咨詢亦據覆稱並未見陳金綬雷以誠同時
入城迨追賊撤隊後始於老虎山得見萬福橋
勇壯先後趕到其無人用梯登城益屬可信昨
據雷以誠呈繳所獲旗幟各件復與原摺數目
不符其意不過欲爲帶勇員弁冒功兼爲自己

脫罪地步茲閱其奏稿更有疊次殺賊等語尤屬全無影響雷以誠連年以養勇爲名濫開捐局無裨兵餉徒朘民膏現聞雷以誠於三月二十三日渡江赴吉爾杭阿軍營至今未回臣已行文催令卽日回揚聽候查辦今陳金綬業已身故若令雷以誠暫駐東岸非特兵心不服卽民心亦復不平至查辦各事臣當與翁同書逐

事細查據實具奏不敢蹈軍營欺飾積習奏入
上諭內閣曰德興阿奏稱揚州收復雷以誠與陳金綬
是日泊船萬福橋並未聞督隊進攻該革員前奏所
稱東路疊次殺賊等語全無影響且呈繳所獲旗幟
各件復與原奏數目不符顯係事後捏飾希圖脫罪
陳金綬雷以誠以幫辦大員於瓜州賊匪出撲並不
實力督率致令兵勇潰散迨收復揚州後復敢捏稱

助勦辜恩昧良殊堪痛恨陳金綬業經病故雷以誠
著卽拏問交德興阿等嚴行審訊請旨定奪所有交
查各件仍著逐一查明具奏

同日何桂清奏言准向榮檄委總兵銜前雲南
楚雄協副將秦如虎統帶川廣兵勇一千名吉
爾杭阿派撥提勇五百餘名江長貴派撥執勇
五百名川銳勇五百名並於蕪湖另募新勇接

替先後起程來浙張芾因婺源與樂平景德連
界嘗於祁門瀛亭等處派撥兵勇前往防堵兼
以援應常山開化詎行至中途樂平之賊已於
三月初七日由萬年竄入婺源縣境復由東路
竄入五嶺張芾派台川徽各勇馳往擊退頗有
斬獲而景德之賊復於十二日乘虛竄入祁門
一心嶺張芾飛派川浙官兵迎敵獲勝逆蹤飄

忽靡常已由閒道繞至漁亭其婺源一股賊匪
又從五嶺至龍灣竄入瑤溪一帶張芾督率郡
城兵勇駐紮七里頭扼其內竄徽浙之路一面
飛飭川營參將周天受前往堵剿並令廣東肇
慶府知府程葆篈召鄉團助戰先後接仗十餘
次賊蹤遠遁臣查徽郡祁門西北一帶時有賊
蹤而嶺隘紛歧防不勝防婺源遠在嶺外無險

可扼乃樂平景德之賊同時乘虛內竄窺伺徽
浙兩路軍情萬分喫緊張芾督率周天受程葆
於大兵未到以前堵勦兼施更幸該郡民皆向
義助戰者萬餘人旬日間卽轉危爲安惟祁門
股匪已從羊棧嶺竄擾甯國府屬之太平縣婺
源餘匪亦由箬嶺竄入太平縣境逆情詭詐多
端勢將窺伺甯國以牽綴金陵江浙之師現在

張芾已派兵追勦並經督辦甯國糧臺之道員胡元博及該管道府均派撥兵勇前赴太平勦辦而南陵旌涇各縣及甯國郡城兵勇均不免單薄且自太平而東爲甯國縣廣德州均與杭湖兩屬交界尤爲浙省之憂刻下徽境已安而江西情形尙緩所有秦如虎一軍應卽移緩就急進援甯國臣已飛檄該副將帶同虎坤元由

昌化取徑叢山關進發於甯國駐紮其吉爾杭
阿派來之捷勇亦飭馳赴該處歸秦如虎統帶
合隊迎勦至連界之於潛昌化長興孝豐等縣
亦一律設防以爲後路接應奏入報

聞

初九日

乙未

正白旗漢軍副都統德興阿陝西提

督鄧紹良詹事府少詹事翁同書奏言查廣東

續雇紅單船二十七隻都司黃彬所帶頭幫十
三隻已於三月二十日泊抵焦山刻下上游當
蕪一帶情形稍緩下游如浦口觀音門均爲賊
船出沒之所警報頻聞土橋毗連儀六防堵尤
關緊要所有此項紅單船十三隻除吉爾杭阿
已撥三隻暫駐三江口防勦外其餘十隻應仍
歸陳國泰經管卽由陳國泰酌撥浦口觀音門

兩處助防庶浦口以下各要隘不至船單江面
堵防更爲嚴密仰懇

天恩俯准施行奏入

上命軍機大臣傳諭德興阿鄧紹良翁同書曰紅單船
前幫十三隻已經入江浦口觀音門均爲賊船出沒
之所土橋毗連儀六尤關緊要著准其將紅單船十
隻歸陳國泰經管仍嚴飭該員分布要隘嚴密堵剿

江北水師原歸德興阿調遣軍情緊要不事事待
旨而行

德興阿鄧紹良翁同書又奏言四月初二日儀
徵逆匪竄及北山自硯臺山至廟山一帶處處
皆賊悉向西北竄越當派協領富明阿等帶馬
隊抄前攔截卽遇大股賊匪四五百人接仗斃
賊極多該逆倉卒思遁又被兵團搜捕總兵翰

殿華遊擊吳奉龍帶兵兜勦臣德興阿親督參
將英貴等由中路進攻往來衝突賊隊頓分兩
截我兵乘勢掩殺廟山敗賊正在回奔又經富
明阿等沿途追殺十餘里屍骸徧地賊悉遁入
龍和集新城等處共斃賊八百餘名落水淹斃
者無算奪獲刀矛器械三百餘件救出被脅難
民幾及千人是日臣鄧紹良總兵安勇等帶兵

分東西兩路進攻三汊河賊匿不出嗣經官軍
誘敵轟斃賊數十名據生擒賊供逆首秦曰綱
現派五六千人由北山後路攻打六合不料官
兵齊來截殺等語臣等現飭穆克登額嚴扼儀
六衝途並相機在儀邑東路追勦又連日疊飭
知縣溫紹原及富春等協力守禦至向榮所派
明安泰統帶援兵一千名現駐六合足資防勦

臣等此時總以嚴扼西北山路爲要著一面分
攻三汊河以分賊勢奏入

上諭內閣曰此次截勦儀徵竄匪尙爲得手著德興阿
卽督飭各員弁嚴扼西北山路一面分攻三汊河務
期迅速埽除毋令竄逸

同日廉兆綸奏言臣疊據探報陷踞安仁之賊
因貴溪有兵勇防堵未敢徑前衝突及竄餘干

樂平等縣後又因駐紮饒河之贛南道覺羅耆齡帶勇迎勦遂連日下竄安徽之婺源休甯一路而去現卽廣饒二郡情形而論安仁及餘萬德樂等縣已無賊匪省城水路亦可通行惟撫建二郡逆匪尙多現復招集土匪蔓延日甚探聞省城已遣兵勇由進賢往攻撫州又札調升用同知李元度由饒州取路安仁進兵合勦設

兩路兵勇到後撫賊聞風上竄廣信仍在在堪
虞臣已連次飛函詢問省城的確消息尙未接
據覆音此聞幸安仁以北警報稍鬆商民稍稍
復業臣所辦集團招勇等事始得略有規模刻
下所招之勇已及千人台之廣信舊招現守貴
溪弋陽各隘口之勇共有二千俟一律訓練整
齊亦足以彈壓地方分防要隘臣擬請卽暫駐

廣信督飭地方官管帶新舊練勇協助官兵相機進剿俟江省軍務稍平他郡可以按試再將所招之勇交該地方官酌量情形分別留遣妥爲辦理

同日閩浙總督王懿德福建巡撫呂佺孫奏言准廉兆綸咨稱逆匪自竄擾撫州後連陷進賢豐城東鄉安仁等縣省城文報不通請調重兵

馳援並據各屬探報建昌府城已被逆匪竄踞
萬年餘干樂平貴溪各縣均有逆夥滋擾查該
逆狼奔豕突連陷郡邑閩省邵武建甯各屬向
恃撫州建昌爲屏蔽今撫建相繼淪陷匪氛偏
近樂平貴溪等縣又距衢州府屬不遠防堵在
在喫緊臣等現調漳州鎮轄九營兵一千名泉
州陸提六營兵六百名興化城守營四百名另

雇漳州勇五百名泉州勇三百名興化勇二百
名合成三千名均交延平城守副將張從龍統
帶護閩安協水師副將陳上國協帶由臣王懿
德面授機宜飭令星速起程馳赴江西確探何
處軍情緊急卽由何路進兵扼守相機協勦仍
飛飭衢防文武會籌布置互相聲援庶於閩浙
防務較有把握地方可期鞏固均奏入

上命軍機大臣傳諭廉兆綸曰現在安仁以北賊氛稍戢省城水路漸通廉兆綸暫駐廣郡新募之勇及舊招守隘各勇約有二千自應多方激勵以資彈壓其由閩赴江之兵勇並經王懿德等調足三千名派副將張從龍陳上國管帶探明江西何路緊急卽由何路進兵廉兆綸惟當督飭地方官令將新舊練勇協助官兵堵守要隘一俟閩浙援師趕到卽可探賊所

向漸次翦除至該學政所探江西省城有分遣兵勇
由進賢往攻撫州及派李元度由饒州取道安仁合
剿之信仍當確探消息隨時奏報

初十日

丙申

德興阿鄧紹良翁同書奏言據范驥

景和稟稱連日會同兵團由東西北鄉三路進
剿水師陳國泰亦撥水勇登岸四面夾攻逆匪
始則踞城堅守嗣見我軍大隊進攻卽開東門

竄出當於四月初一日將儀徵縣城收復仍奮力追賊至新城一帶殺死及溺斃無算惟查儀徵雖經收復而賊壘尙在帶子溝等處臣等一面檄飭穆克登額帶領馬隊五百名會同總兵李志和等帶步隊一千餘名在儀徵扼堵並隨時協同揚營各兵相機兜剿仍一面由西北山抄前攔截以遏旁竄奏八報

十三日己亥曾國藩文俊奏言道員劉長佑親督
楚勇二千餘名於二月初六日行抵距萍鄉十
里之青山鋪城內擁出大股賊匪約三四千人
分路抄撲守備梁開國等且戰且誘回至青山
鋪劉長佑率勇由中路迎擊槍礮齊施該逆紛
紛退向山坡分左右兩路併力來抄我軍百長

許繼衡等由左路迎擊李明惠等由右路迎擊
梁開國衝入賊隊手刃紅衣賊目許繼衡等從
松林截出殺賊百餘名賊勢披靡我軍兩路直
偏城根城內賊復悉衆出巢計將乘我我軍返
旗回擊將賊隊衝爲兩段復大敗之計斃賊三
百餘名初七日劉長佑飭令都司田興恕等移
營黃花渡守備黃三清率勇進紮葡萄嶺十一

日卯刻出隊進攻萍城該逆擁擁前來撲營劉
長佑派李明惠許繼衡黃三清等分左右中三
路迎擊自率一旅潛由路旁田隴橫抄以出該
賊後隊敗退首尾不能相應時左右兩路之賊
業經奔潰因賊首被圍回頭衝突我軍分投截
殺黃衣賊目被圍愈急撲火自焚各路之賊拋
棄器械鼠竄入城我勇列隊環攻是日約斃賊

千數百名生擒七十餘名割取首級三百八十
顆奪獲器械旗幟無算劉長佑傳令次早攻城
四更時探報該逆將城外各巢燒燬勢將他遁
卽乘月督隊前往黃三清李明惠等由城西大
路進攻田興恕梁開國等由城北小路截出該
逆望風驚潰自相踐踏我軍一面追勦一面入
城安撫其由瀏陽進攻萬載之同知蕭啟江等

兩營於二月初九日紮萬載之珠樹潭分布各
隊十一日南岸出賊千餘直趨平岡另股二千
餘人繞出營後把總周崇高率四哨勇與平岡
之賊相持蕭啟江馳往助戰忽山下之賊麕至
乃揮令軍功彭文德等併力抵住蕭啟江復進
徧山下之賊把總楊恆陞亦張左右翼抄之賊
被圍紛竄我軍節節追徧逃者無幾是日約斃

賊千餘人生擒五十餘人查萍萬兩縣與湖南
接壤山路歧雜最易藏奸已飭劉長佑節節搜
勦一俟兩路兵勇會合然後併力進攻袁郡迅
圖克復奏入

上諭內閣曰湖南援師疊獲勝仗克復萍鄉復由瀏陽
進攻萬載於珠樹潭接仗獲勝仍著曾國藩等飭令
劉長佑分派各軍節節搜勦廓清土匪以期進勦袁

州迅圖克復

曾國藩文俊又奏言臣曾國藩於上年招募湖南平江勇飭李元度練成一軍臣文俊又募平江勇二千餘人派知府鄧輔綸同知林源恩一同統帶約會於進賢東鄉等處進剿冀以保全廣信規復撫建二月二十三日李元度自湖口拔營赴饒逆黨突出千餘人分三路來撲我軍

俟其偏近橋壩開礮轟擊連斃數賊營官彭斯
舉等復分三路抄擊殺賊六七十名賊匪奔潰
追入湖口沿途又斃賊五六十名二十九日李
元度一軍行抵饒州臣等卽飭其暫時駐兵而
令鄧輔綸林源恩自進賢一路前往東鄉以圖
會合進剿三月初七日鄧輔綸等自省城起行
臣等又派周鳳山帶勇八百名前往助剿十一

日行抵羅溪地方該逆排立湖岸礮聲四起鄧
輔綸等督飭各營馳過湖路該逆分三路來撲
都司周岐山等帶鳳字營迎頭勦殺復有賊千
餘人由隄路抄擊鄧輔綸等派左營耿光宣等
沿隄截勦殺賊多名該逆力不能支紛紛敗退
奔回進賢縣我軍追擊十餘里計共殺斃賊匪
二百餘名十二日林源恩督帶中營勇五隊當

先鄧輔綸領五隊繼之左營耿光宣右營高夢漢分兩翼以擊其旁都司畢金科緊爲接應各營遄行距進賢縣三里卽有賊數千叢擁直前林源恩帶前隊疾趨迎擊我軍士氣百倍立斃長髮賊一百餘名該逆退奔各哨急追兜擊復殺斃八九十名中營哨勇由西北角梯繩登城殺守堞賊十餘人燒燬望樓大呼同進卽將進

賢縣城克復伏查省東撫建廣饒四府皆以進
賢爲咽喉要路此次兩戰克復東路漸有轉機
臣等現飭李元度自饒州起程與鄧輔綸林源
恩等會合迅往撫州圖克郡城奏入

上諭內閣曰進賢爲省東要路此次兩戰克復辦理尙
屬得手卽著飭令李元度等會合兵勇迅復撫州毋
令逆匪久踞蔓延

曾國藩文俊又奏言青山水師於二月二十六日行抵吳城湖口賊船亦卽尾追而上分泊於渚磯等處而德安建昌之土匪與湖口之賊聯爲一氣冀撲我師臣等因調彭玉麟由樟樹鎮馳赴吳城以資鎮攝三月初二日彭玉麟尙未到防有陸賊數百人蠡擁而來至吳城後河西岸搭造浮橋賊船亦至河口之下左營陳炳元

等以長龍船紮泊前河親兵營各船紮泊後河而分三板之半由前河直下包抄賊船以一半赴後河攻勦陸賊該匪見官軍直下賊船遂退竄渚磯而陸賊排立望湖亭對岸施放槍礮各水勇一躍登岸揮旗直前刺殺長髮十餘名陸賊紛紛敗北我軍窮追約二十餘里賊船之下竄者水軍亦追逐十餘里復將後河賊划概行

焚燒初四日彭玉麟抵吳城鎮飭各營嚴密防
範十二日有陸賊約千人由涂家埠搭浮橋而
來至吳城上游分股抄出彭玉麟派嚮導左右
三營登岸陸戰賊之至河干者我軍三板排礮
齊發轟斃賊十餘名該逆無所遮蔽遂退入隄
內抄出直窺街市我軍突起直前擊斃二十餘
名該匪敗北至小港之前鳧水而遁彭玉麟以

陸賊之來係由涂家埠搭造浮橋而過必先清
來路之源各軍始得安枕十四日飛檄疾行馳
抵涂家埠見賊浮橋二道甚爲堅固橋內灣泊
賊船約百餘號我軍船一齊駛進該逆用擡槍
抗拒鏖戰逾時我軍點放排槍礮子如雨賊勢
稍卻各勇一鼓衝入砍斷篾纜拆毀浮橋二道
賊見我軍衝過浮橋將所據船隻急速開行我

軍乘勢尾追拋擲火彈一船焚燬衆賊驚慌我
軍見賊大潰極力窮追約十餘里計燒賊船數
號奪獲二十餘號臣等查內湖水師自去歲駐
紮青山姑塘以來東岸有湖口陸兵西岸有青
山陸兵兩相依護聲勢甚壯一旦與陸軍遠隔
駐泊吳城孤懸賊中幾有防不勝防之慮幸兩
次登岸陸戰一次遠出迎擊俱獲勝仗從此卽

可堅駐該處保障下游奏入報

文俊又奏言自樟鎮再陷周鳳山一軍退回省垣該逆乘勢直趨豐城署知縣張韶南把總宛世雄先因濠湖墟一帶賊氛緊急帶勇往勦聞信馳回賊已乘虛撲入縣城遊擊遮克敦布一軍禦賊失利賊遂於二月二十三日攻陷撫州

府城並分竄進賢東鄉等處進賢縣知縣史昌壽登陴固守因賊衆兵單力竭城陷史昌壽與營弁各受重傷家人掖之而出得免遇害二十六日賊由東鄉竄入安仁縣城二十八日分二股一竄餘干一竄萬年建昌府城亦於二月二十九日被匪竄陷查該逆擄掠重貨帶領賊衆二萬餘人已由饒州各屬地方經過分踞吉瑞

袁臨撫建六郡勾結土匪四出劫掠臣現同曾
國藩商派李元度與周鳳山鄧輔綸等統師先
由進賢攻勦以期次第迅克各城並分撥各軍
兜勦附省各縣以清肘腋之患署餘干縣知縣
陶慶瀄萬年縣知縣邢肇需於匪衆過境力保
縣城應免置議署豐城縣知縣張詔南於城破
後卽與把總宛世雄糾集鄉團各勇立將縣城

克復進賢縣知縣史昌壽乘周鳳山等統兵進
勦接濟兵食隨同收復張韶南史昌壽力竭失
守事後尙知愧奮均請

旨革職留任以觀後效豐城縣縣丞譚士淮教諭蕭祖
琛訓導李同經查明先期往鄉分別勸捐辦團
典史柳先傳解犯進省並未在城均係因公出
境並無規避情弊請

飭部均免開缺奏入

上諭內閣曰本年二月間江西臨江逆匪分竄豐城撫
州進賢東鄉安仁等府縣建昌府城亦被匪竄陷現
經曾國藩文俊派令李元度周鳳山等合師進剿次
第克復各城所有失守各員自應分別查辦署豐城
縣知縣張韶南於城破後糾集鄉團會同水師克復
縣城進賢縣知縣史昌壽接濟兵食隨同周鳳山等

收復縣城尙知愧奮均著革職暫留本任豐城縣縣丞譚士淮教諭蕭祖琛訓導李同經查係先期出城勸捐辦團典史柳先傳解犯進省並無規避情弊均著免其開缺

文俊又奏言再袁州府知府紹德於失守府城後退駐蘆溪正月十七日賊撲萍鄉紹德與萍鄉縣知縣萬清督兵接仗不意另股賊匪由小

路襲入縣城以致敗退湘東駐紮二月初四五
日湖南劉長佑之師已抵萍鄉袁州協副將蔣
益輝與紹德萬清所帶袁萍兵勇及署宜春縣
知縣錫榮所帶宜春勇俱隨同夾擊分路攻城
該逆驚潰由南門逃遁遂將縣城克復查紹德
錫榮於失守後退駐萍鄉宜春交界之蘆溪地
方收集敗潰兵勇激勵鄉團守候湖南援師入

境卽各帶勇壯隨同劉長佑克復萍鄉尙知愧
奮惟郡城失陷究屬守禦不力袁州府知府紹
德署宜春縣知縣錫榮均應請

旨革職責令隨營效力俟克復郡城後再行查辦萍鄉
縣知縣萬清於縣城失陷業已隨同克復原可
責令留任辦理善後惟查該令才識迂拘難勝

民社應請

旨卽行革職至袁州協副將蔣益輝統轄協營失陷城
池守禦不力卽有應得之罪雖已協同克復萍
鄉縣城功不抵過應請

旨革職聽候查辦該員年力已衰毋庸留營效力奏入
上諭內閣曰上年十二月及本年正月袁州府城並萍
鄉縣城先後失陷袁州府知府紹德署宜春縣知縣
錫榮於失守後收集兵勇激勵鄉團隨同劉長佑援

兵攻克萍鄉尙知愧奮惟郡城失陷究屬守禦不力
紹德錫榮均著革職責令隨營效力俟克復郡城後
再行查辦萍鄉縣知縣萬清於縣城失陷業已隨同
克復惟才識迂拘難膺民社著卽革職袁州協副將
蔣益輝失陷城池守禦不力雖經協同克復萍鄉功
不抵過著卽革職該員年力已衰著毋庸留營效力